

# Dr Mahathir gembira isu Presiden Filipina selesai

BH 21 JAN 2011

OSAKA: Perdana Menteri, Datuk Seri Dr Mahathir Mohamad gembira isu Presiden Filipina yang membawa kepada demonstrasi besar-besaran di negara itu, dapat diselesaikan berikutan peletakan jawatan Joseph Estrada, semalam.

Beliau yakin Naib Presiden Gloria Macapagal Arroyo yang dilantik menggantikan tempat Estrada akan dapat bekerjasama dengan Malaysia.

"Kita tahu sikapnya dan pendiriannya terhadap Malaysia. Yang penting sekarang ini soal siapa jadi Presiden sudah selesai di Filipina," katanya kepada wartawan selepas menerima kunjungan hormat Menteri Ekonomi, Perdagangan dan Industri Jepun, Takeo Hiranuma di hotel penginapannya di sini.

Beliau berkata demikian ketika diminta mengulas peletakan jawatan Estrada berikutan demons-

trasi besar-besaran di Manila sejak beberapa hari lalu yang mendesak beliau meletak jawatan kerana tuduhan rasuah.

Menurut agensi berita, Arroyo mengangkat sumpah sebagai Presiden berikutan satu pengisytiharan oleh Ketua Hakim Hilario Davide yang jawatan Presiden sudah dikosongkan.

Estrada dilaporkan berkata, beliau meletakkan jawatan bagi mengelak daripada menjadi penghalang kepada proses pemulihan negara itu.

Dr Mahathir yang berada di sini untuk lawatan kerja empat hari, berkata Arroyo, anak bekas Presiden Diosdado Macapagal, akan dapat menumpukan kepada pemulihan Filipina, terutama dari segi ekonomi.

"Ini kerana nilai peso umpamanya, jatuh begitu teruk dan tidak dapat tidak turut membawa kesan kurang baik kepada Asean

termasuk Malaysia," katanya.

Beliau berharap dengan penyelesaian isu Presiden Filipina itu, ekonomi negara berkenaan akan pulih dan Malaysia dapat berinteraksi dengan mereka dalam bidang perdagangan.

Sementara itu, Menteri Luar, Datuk Seri Syed Hamid Albar berkata Malaysia gembira dengan peralihan kuasa yang berlaku secara aman di Filipina.

"Peralihan kuasa itu berlaku secara aman tanpa keganasan, dan mengikut perlembagaan Filipina," katanya dalam kenyataan yang dikeluarkan Wisma Putra di Kuala Lumpur.

Kenyataan dua perenggan itu, juga mengucapkan tahniah kepada Gloria Macapagal-Arroyo yang dilantik sebagai presiden yang baru negara itu, dan mengharapkan Malaysia akan dapat bekerja sama dengan pentadbiran baru itu.